

Tortolì. Resèssida manna sa premiatzione de su cuncursu Tortolìricas



Grandu partetzipatzione e brègiu custu mangianu in s'aposentu de is riuniones de su Comunu de Tortolì, durante sa premiatzione de su cuncursu "Tortolìricas, is bellesas de Tortolì... in poesia", promòvidu dae su Comunu cun s'amparu de sa Regione Sardigna.

S'atividade de s'Isportellu de sa Limba Sarda, promòvida dae s'Assessoradu a sa Cultura, ghiadu dae sa responsàbile Luisa Loi, cun sa collaboratzione de s'Assessora Rita Cocco, at cunfirmadu s'importu de sa valorizatzione de sa limba sarda e de is bellesas locales pro mèdiu de sa poesia.

Su Sìndigu Marcello Ladu at espressadu cun satisfatzione su ringraziamentu suo a is iscolas interessadas, sutaliniende s'importu de su traballu de grupu e de sa collaboratzione. "Fàghere iscuadra est fondamentale", at declaradu, evidentziende s'impinnu siat de

s'Amministrazione comunale chi de s'Isportellu de sa Limba Sarda, torradu a abèrrere dae pagu a pustis de annos de serrada, pro afortiare su ligàmene de is generatziones noas cun sa limba sarda e su territòriu pròpiu.

A sa premiatzione fiant presentes medas cunsigeris de sa majoria, comente sa Presidenta de su Cunsìgiu Mara Mascia, sa Cunsigera Stefania Vargiu, su Cunsigieri Michele Fanni e s'Assessore Fausto Mascia, chi ant partetzipadu in manera ativa premiende diversos pipios.

Protagonistas printzipales sunt istados is iscolanos de is cuartas de is iscolas primàrias, chi cun creatividade ant contadu, in versos, is meravìllias naturales, artisticas e archeològicas de Tortolì. Is poesias premiadas dae sa giuria, presidida dae su poeta Pietro Falchi cun sa collaboratzione de s'espertu de limba sarda Ivan Marongiu, si sunt distintas pro sa calidade issoro e originalidade, tanti ca est tocadu a fàgher s'assegnatzione de unos cantos primos postos ex aequo.

Cada classe at retzidu unu bonu de ispesa pro comporare materiale didàticu. In prus, totu is poesias in cuncursu ant a èssere regortas in unu librigeddu chi at a èssere donadu a is classes interessadas.